



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma : Tir Yimyim

tiryimyim@aolima

tir yimyim

TAPAK 3

Gaza nung aliba al-Shifa hospital ya 'death zone' ama lir: WHO

Tunnel agi nembanga alirtem'anogo ana tsungda kumzüksü: Gadkari



WHO

VOL. XXI NO. 43 (ADOK 43) DIMAPUR TENTONÜ (MONDAY) YIMPOKSÜI (NOVEMBER) 20, 2023 ₹ 5.00

Nicaragua tsür Sheynnis Palacios-i Miss Universe 2023 takok korang angu



Jose Adolfo Pineda Arena nung Miss Universe 2023 Sheynnis Palacios-i takok korang anguba sülen telok dak teka ayiploksüba angur.

New Delhi, November 19, 2023 (Agencies): Arishi kum 23 tain Nicaragua tsür Sheynnis Palacios-i Miss Universe 2023 takok korang nguogo.

Miss Universe 72 buba tetoktepba ya Honibar nikongdang El Salvador kubok Jose Adolfo Pineda Arena nung agi.

Taküm tetoktepba nung Miss Thailand Anntonia Porsild-i tanabuba jenjang aser Miss Australia Moraya Wilson-i tasembuba jenjang takoktem ngua liasü.

USA tsür Miss Universe 2022 R'Bonney Gabriel-i Sheynnis Palacios nem takok korang semoktsü. Arishi kum 23 tain Sheynnis ya Managua, Nicaragua nungi mental health activist aser audiovisual producer ka lir.

Miss Universe 2023 ama Sheynnis-i mental health atema inyaktsü. Sheynnis-i linük 83 nungi tetokteperem madak takok angu.

Sheynnis-i mass

communication nung degree ka nguteta lir aser lar university atema varsity volleyball asayaogo.

2016 kum Sheynnis-i Miss Teen Nicaragua 2016 takok korang anguba sülen beauty pageant nung shilem agia arur. Lai Miss World Nicaragua 2020 takok angu aser 2022 nung Miss World 2021 competition mapang lai lar linük atema shilem agia liasü.

Sheynnis ya Instagram aser TikTok kanga bulua amshiba nisung ka lir aser Instagram nung 5 lakh followers lir.

Taküm tetoktepba nung Miss India Shweta Sharda aser mezüngbuba Miss Universe Pakistan 2023 Erica Robin nati top 20 contestants jenjang atong.

Iba sentong nung television personality Jeannie Mai aser Miss Universe 2012 Olivia Culpo nati host shilem agi aser American singer-songwriter John Legend-i "All of Me" ken aten.

Meira Paibi asür Leichonbam den asüpila sentong agi

Imphal, November 19, 2023 (Agencies): Kuki telungpurtemi khasetba Meira Paibi mezüngbuba Leichonbam Abemcha den asüpila sentong agiogo.

Kangchup Chingkhong nung asür Leichonbam nem tetushi agüja sentong ka ayongzüka agi.

November 7, 2023 nü injang khaloktsüdang Leichonbam kanga mejungi yirur Regional Institute of Medical Sciences nung anepalu saka la süadok.

Leichonbam Abemcha tepsetba atema tentetba Joint Action Committee (JAC)-i mezüngbo parnok takhangba asoshi telangzüba magütsü tashi la indang mang memeshitsü ta noktak.

La indang tasü mang Kangchup Chingkhong nung

anisüngzükdaktsütsü, Sekmai aser Lamsang constituency tem nung Meitei nung amakba Kuki telungpurtem aridoktsü, Kangchup Reserve Forest, Kangchup Chiru Reserved Forest aser Imphal West nung Meitei yimtsüngtem nung ali atsünga agia aliba Kuki nung meindoktsü atema JAC-i takhangba agütsü.

Chief Minister N. Biren Singh-i parnok dang nangzüka sülen JAC-i Leichonbam Abemcha indang mang meshitsü mulungtep.

JAC-isa Imphal West aser Kangpokpi nung security akangshitsü takhangba agütsü.

Leichonbam Abemcha-i la kinungbo aser tanur asem toktsür alima nungi pilaogo.

Imphal Airport nung drone ajanga tayimtsütem sota ayu

Imphal/New Delhi, November 19, 2023 (Agencies): Imphal nung aliba Bir Tikendrajit International Airport nung air traffic controllers ajanga mejangjatetba 'flying object' ka anguba sülen kanga aoksatepogo.

Iba ajanga tayimtsü asem tashi ghonda asem tema meyoki sota ayu aser Imphal-i aruba tayimtsü ana Kolkata aser Guwahati-i meyiper yok.

Airports Authority of India (AAI)-i Imphal nung "controlled airspace" shibang aser tayimtsü

ajak anendaktsü. Iba ajanga passenger 1,000 shi timtem ajurua liasü.

Airports Authority of India (AAI)-i Indian Air Force (IAF) nem airspace control agütsü aser IAF-i bushisüngdangba sülen airspace lapoktsü.

Deobar nikongdang 2:00 ako meta air traffic control (ATC) aser nisungtemi drones yimzüba angu. Ibaji ajanga Air India tayimtsü ana aser IndiGo tayimtsü ka apusoa me yok.

Manipur nung Kuki aser Meitei nung tsungda ita aika

rarayonga aruba mapang ka asüba agi ketdangsürtemi iba tatalokba süoki ia agi. Rarayonga arudang telok aikati drones amshio.

Külen, Myanmar nung sepaitemi India arrtsü anasa Chin State telungpurtem den tayimtsü amshia rarar.

Imphal airport director Chipemmi Keishing-i drone anguba osang tejangja metetdaktsü.

Bangdakpurtemi temelaba agütsüba sülen tayimtsü asem apusoa yok ta Keishing-isa ashi.

Mizoram nungi Myanmar sepai 29 meyipa yokogo

Aizawl, November 19, 2023 (Agencies): November 16 nü Mizoram police ket nung bendang agütsüba Myanmar sepaitem tanü parnok linüki meyipa yokogo.

Air Force helicopter ka ajanga Myanmar sepai 29 anir oa Myanmar ketdangsürtem ket nung agütsü.

Myanmar sepaitem ya November 17 nü anir aotsüba sentong liasü saka Mizoram nung tsünsang majungba ajanga athi.

Parnoki Mizoram arrtsü anasa People's Army CNDP den ghonda 4 shi khatepba sülen tatem nung Mizoram police tsungdang bendanga agütsü.

Mizoram arrtsü nungi kilometre 13 shi dang pilar aliba Tuibual nung November 15 nungi Myanmar Army aser CNDP tsungda khatepa liasü. Iba mapang Myanmar sepai ana asü aser asem yiru.

CNDP tanishirtem aser Myanmar Army tsungda

olemtepba sülen sepai 29 bendanga agütsütsü tenangzüktep ka agia liasü.

November 16 nikongdang 2:15 ako meta Myanmar sepaitem Saikhumphai tonga aru aser pamoki Mizoram Police tsungdang prangpong-injangtem agütsü.

Mizoram Police-i Vaphai Village Council (VC) aser Vaphai Branch Young Mizo Association (YMA) ajanga Myanmar sepaitem pelashishia agizük aser iba sülen Assam Rifles ket nung agütsü.

Karbi Anglong nung BJP züngsem 680 Congress nung aden

Guwahati, November 19, 2023 (Agencies): Karbi nung lennirtem Jagatsing Engti, Pradip Diphusa aser Charishma Rongpipi dena Assam BJP nungi lennir aser züngsem 680-i Congress party nung denogo.

Deobarnü Diphu Club nung sentong ka agidang parnoki Congress züngsem aküm.

Jagatsing Engti ya Autonomous State movement nung tanishir ka liasü aser pai 1996-2001, 2001-2006 aser 2006-2011 nung Bokajan constituency nungi MLA asemben inyakogo.

2012 kum Engti ya Karbi Anglong Autonomous Council (KAAC) nung Surupathar MAC constituency nungi MAC inyaktsü takok ngua liasü. 2016 nung pai BJP nung aden aser maneni Surupathar nungi MAC inyaktsü takok angu. Pai 2022 tashi EM for higher education inyaka liasü saka 2022 election nung pa nem ticket magütsü.

Pradip Diphusa ya Dhansiri MAC constituency nungi kumsük anaben tashi MAC inyakogo. Pai 2012-2017 nunga Congress sorkar mapang EM inyaka liasü. June 23, 2016 nung pai BJP nung aden aser 2017 MAC election nung BJP ticket amer takok angu. Ajistüaka 2022 council elections nung pa nem ticket magütsü.

Charishma Rongpipi ya taoba EM Pradip Rongpi'er jala lir. La ya entrepreneur ka aser Yellow Tree Cafe, Diphu kibur lir.

Tanü agiba sentong nung Karbi Anglong District Congress Committee (KADCC) president

as er taoba minister Sum Ronghang, Congress lennir aser taoba MP Birensingh Ingti; taoba MLA Joyram Engleng; taoba EM Ratan Engti aser taoba EM Ashok Teron nung aden.

"Tanü Jagatsing Engti, Pradip Diphusa aser Kathar Bey nung lenisüba kubok BJP lennir 600 tema Congress nung denogo. 2024 elections nung yangi aliba nübortemi Team India takok angutsü ataba angudang kanga pelar" ta Assam Pradesh Congress Committee (APCC) president Bhupen Kumar Bora-i ashi.

"December 4 nung mesüra matongdang Karbi Anglong nung tanishir aikati Congress nung adentsü. Lennir tejjenn kari ozü party nung züngsem akümtsü akok" ta Borah-isa ashi.

"Jones Ingti Kathar-i aniba APHLC ya party 15 United Opposition Forum nung dena lir. Parnoki Karbi Anglong nung menden talila kar meshir aser onoki iba atema jembidar" ta paisa shisem.

"Onok tesüba kum 7 tashi BJP züngsem süa aruogo. Onoki BJP party aser sorkar telung nguogo. Parnoki sorkar koma ketdangsüa arur onoki meteta lir. Parnoki tesüba kum 7 tashi Karbi Anglong nung ashio kja arur. Parnoki onok asoshi kecha meinyak" ta taoba MLA aser EM Jagatsing Engti-i ashi.

"2014 elections nung parnoki nangzüka meinyak. Autonomous State onük amadokogo. 2014 election atema nüboyimdang LK Advani aser Rajnath Singh amala lennirtemi

Autonomous State tebilemstü koktettsü ta nangzüka ajanga onoki BJP nung aden. Saka Prime Minister Narendra Modi, Chief Minister Himanata Biswa Sarma aser CEM Tuliram Rponghang nungeri onok indang tebilemstütem asoshi mapa meinyaknür" ta Engti-isa ashi.

"UPDS den sign sütepba MoS parnoki mapa kuma meinyak saka 2021 nung ano tanga telungpur telok 6 den tenangzüktep ka agi. Iba tenangzüktep ya-a ano mapa metenzük lir" ta paisa shisem.

"KADC nunga CEM'er kinungertemi tajangzüka angur. KADC ya Congress ajanga tenzüka aser KAAC ya-a Congress-i agütsü. Prime Minister Indira Gandhi-i aniba Congress sorkar mapang Arlla 244(a) enoksem. BJP-i Karbi Anglong atema kecha meinyak" ta Engti-isa ashi.

"Iba ya ni kidangi meyipa aruba ama lir. Ni Congress nung liasü saka 2016 kum BJP-i taila tenangzükbaten agiba ajanga ni BJP nung aden. Modi-i tesüba Congress sorkartemi ochimashi inyakba nung ajemdaker sorkar akümtsü tashi angu saka BJP-i ang ochimashi teimtiba inyaker" ta paisa metetdaktsü.

"Onoki BJP sorkar ketdangsübaren yimya nguogo. BJP-i ochimashi inyakba ajanga nübortemi parnok dak tamang maka kumogo. Congress mapangbo iba amai matalok ta nisungtemi jembir aser parnoki Congress sorkar arudaktsünür" ta Pradip Diphusa-ia ashi.

Tetso College nung Anti-Drug awareness campaign ayongzük



Dimapur, Yimpoksüi/Nov. 19 (TYO): Lanurtem temesepba mozü amshiba nungi jembua alitsü nükjidong nung Assam Rifles temi November 17, 2023 nü Tetso College, Chümoukedima nung Anti-Drug awareness campaign ayongzüka liasü.

Iba sentong nung tesemdanger tongti ka ama Miss Nagaland, 2022, Hikali Achumi dena liasü.

Brigadier, SK Shukla, CDR 6 Sector AR ajanga iba sentong nung jembidang, temesepba mozü amshiba ya alima asoshi tayongzükba lir, aser iba yagi, arütsü, sobaliba aser socioeconomic memetet, ta ashi.

Iba ya tebilemstü tulu lir, koba ajanga loktiliba aser kibong raksatsür, tamang samadaksür aser kija takum nung sempet samadaksür. Temesepba mozü anema raraba ya policy aser enforcement tongpang ka ama mebilemstüla saka ajak lungjemer nokdaksüla, ta pai ashi.

Temesepba mozü amshiba samadaksütsü asoshi education

ajanga tongtipang shilem agiteter. Awareness aser angatetba ajanga dang nüburtemi iba tebilemstü angateter, ta Shukla-i ashi.

Pai kaket reju, lokti tentet balala aser kibongtem dang drug education program tem ayongzüka agitsü aser lanurtem nem iba indang angatetdaksütsü ayongzüka liasü.

Ozüng mapa kuma amshiba indang jembiba mapang pai sentepa alirtem dang parnok den yaritepa temesepba mozü shibelenba network raksatsütsü ashi.

Anti-drug campaign takok ngua agitettsü asoshi nüburtemi shilem agiba ya mera tongtipangtiba lir, anungji nisung ajaki dang lungjemer iba tongpang raratsüla, ta pai ayongzüka liasü.

Brigadier, SK Shukla-i ashiba agi, 2023 küm January ita nungi tenzüka tang tashinung Assam Rifles temi sen 4,26,51,500 jenjang temesepba mozü pua lir.

Awareness tali agütsütsü mechi IGAR (N) ajanga Kripa Foundation aser Miss Nagaland,

Hikali Achumi den lungjemer Kohima nung Anti-Drug Campaign ayongzüka agiogo aser anu iba mesükba sentong ya Tuensang, Mon aser Mokokchung nunga November ita ayongzüka agitsü sentong lir ta pai ashi.

Lokti nungi iba tebilemstü samadaksütsü merangba nung Assam Rifles teti Nagaland nung aliba nüburtem den lungjemer inyaksü ta ashi.

Iba sentong nung Assam Rifles temi sentong balala ayongzükba indang movie clip tatsüka sayua liasü aser Patkai Christian College ajanga Sumi nungi tetsü-tebou tsüngsang ka agi shilem agi, Living Stone Higher Secondary School aser Tetso College ajanga telok ken ka aten, Nagaland University ajanga Dance of seven sisters aser Rhino Jazz Band ajanga shilem agia liasü.

Iba sentong nung NGBF, S Jalipu; Miss Nagaland Hikali Achumi; Meren T. Jamir, Prodigals Home aser GB Shikato nungeria o tatsütsü jembia liasü.

Manipur-i Meetei Mayek oshi nung Indian Constitution menüngtsü

Guwahati, Yimpoksüi/Nov. 19 (Agencies): Constitution of India ya Meetei Mayek script nung zülutsü, ta Manipur Chief Minister N Biren Singh-i X (Twitter) nung ashi.

Meitei script dang ya Manipuri script ta ajar, aser iba ya Meitei oshi züluba nung amshir, koba Manipur state indang official language lir aser India nung aliba official language 22 rongnung ka lir.

Iba ya Indian Republic indang official scripts ka lir. Iba dang ya Kanglei script aser Kok Sam Lai script ta ajar.

Meitei Script ya 6 century AD nung mezüng amshi südi ta bilemer.

"Iba ya ajanga Manipuri script temaba jenjangi ajungketba kisüng masü saka Manipuri oshi jembir mesüra Meiteilon asosi Indian Constitution indang kishi ka lapoktsür," ta CM-i tweet asü.

Law and Legislative Affairs Department, Government of Manipur ajanga Constitution of India indang diglot edition (English-Manipuri) adoktsü aser ibaji Manipuri Meetei Mayek Script nung adoktsü ta angazüka kanga pelar, ta Chief Minister Biren Singh-i ashi.

Constitution of India ya linük indang ozüng tematiba lir, kong fundamental rights, directive

principles aser fundamental duties of citizens indang shia lir, ta CM-i ashi.

Iba nungya political structure, sorkar indang inyakyim aser tashi shia lir.

Indian Constitution ya aliba nung constitution züluba talangtiba lir, ta pai ashi.

Constitution of India amshi tenzüker küm 73 jungaka yangji aliba aika nüburtemi memetet, kechiaser pei oshi nung mali, ta CM Biren Singh-i ashi.

Iba document ya state ajunga asoshi rongsen tulu asütsü aser Manipur state puti otsü nung tongtipang alizüng ka tongtetba alitsü, ta pai ashi.

APSC ken o nung Assam sorkari ketdangsür 34 nem show-cause notices agütsü

Guwahati, Yimpoksüi/Nov. 19 (Agencies): Assam Public Service Commission (APSC) ajanga 2013 batch asoshi shimba ACS, APS, and other allied service officers 34 anema Assam sorkari 'departmental proceedings' tenzüko.

Ketdangsürtem shimba nung tim masüba mapa inyaka lir ta Justice (ret) Biplab Kumar Sharma Commission indang report nung ashiba sülen iba mera ya agir.

Osangtem ajanga ashiba agi, Home and Personnel departments ajanga ketdangsür 34 nem show-cause notices agütsüogo, shirnok tim masüba yimya amshia mapa angu ta temolung melemi lir.

Sharma Commission indang report agütsüba aser iba sülen Assam Chief Minister Himanta Biswa Sarma ajanga totuyuba agütsüba nung ajemdaker item show-cause notice ya agütsü.

APSC recruitment nung tim masüba mapa inyakba dak sendakba nung Gauhati High Court ajanga par tangatetba lemsatetba sülen Sharma Commission ya tenteta liasü.

HC ajanga par tangatetba lemsatetba sülen Assam CM Sarma-i iba ken o tali bushisüngdangtsü asoshi special

investigation team (SIT) ka tentettsü totuyuba agüja liasü.

SIT ajanga Gauhati High Court nem tongtipang onük pezü nung interim report agütsütsü imlar. Gauhati High Court ajanga APSC recruitment scam ken o ya November 22 nung jembitsü lir.

2016 küm nungi APSC recruitment nung mangatetep agi sünger arur. Iba küm APSC chairperson inyaka alisang Rakesh Paul ya mapa agütsütsü mechi süpokrem agiba ken o nung pua liasü. Iba inyakyim dak sendakba nung ketdangsür 57 tashi mapa nungi anentsüogo.

June ita Justice (ret) Sharma kübok nisung kati akumba commission ajanga 2014 batch nungi ACS and APS officers 19 jaoka mapa yong sen amshiba inyakyim nung parnok shilem aliba indang kuli meshia liasü.

Sen agi mapa aliba candidate tem kumzüka ayutsü meranger, ta Leader of opposition Debabrata Saikia-i CM Sarma aija liasü.

APSC recruitment scam nung tai tonglokja alirtem kumzüka ayutsü meranger, ta opposition party temi CM Sarma aser BJP-i aniba sorkar aija liasü.

Donyi Polo airport küm ka ajungba tepela CM Pema Khandu-i lemsatep

Itanagar, Yimpoksüi/Nov. 19 (Agencies): Küm ka tejakdang Ato Kilonser Narendra Modi-i semzüktsüba, iba airport yanglu tenzüka aser yangluba maparen balala indang video ka Arunachal Pradesh Chief Minister Pema Khandu-i social media sapang X (taoba mapang Twitter ta ajaba) nung lemsatetba liasü.

"Donyi Polo Airport küm ka ajungba benjonger! Küm ka tejakdang Ato Kilonser Narendra Modi-i iba anogo nung Donyi Polo Airport semzüktsüba sülen, maongka balala aser state ainba tsütsü

süngkum ka amai lir," ta CM Khandu-i ashi.

Donyi Polo airport ajanga alima map nung state inoksemogo, ta pai ashi.

"Iba Airport ya shishilempaba, tourism, cultural exchange asoshi temelenshi bener arutsür ka kumogo aser Arunachal Pradesh ya global map nung inoktsür.

Senzüsempongertem aruba ajanga iba airport ajanga tesendaktep tsütsü temelenshi bener arutsüba sayur. Mapang süyia aoba ama tarutsü anogotem nunga teimla tulu ayur," ta CM Khandu-i ashi.

Myanmar nunger Champhai nung jenoker

Aizawl, Yimpoksüi/Nov. 19 (Agencies): India aser Myanmar arütsü anasa Myanmar army temi tayimtsü amshia amakba sülen Myanmar nunger nisung 5000 shi Mizoram nung Champhai district kübok Zokhawthar area nung jenoka lir. Champhai nung Zokhawthar yimtsüng ya Myanmar den arütsüa lir.

District administrationde NGOs, Young Mizo Association aser Village Council temi item refugee nem chiyongtsü, abensüoshi aser mozü agütsür.

Refugee tem ya tang Zokhawthar nung khen atema yanglua aliba süki nung alir. Zokhawthar nung Young Mizo Association lenirtemi ashiba agi, iba tesem nung relief aser

refugee camp pezü-pongu ka yanglua lir.

Myanmar Army aser People's Defence Force (PDF) tsüngta tang kanga sashia raraba mapang lir, aser iba yongji refugee tali-tali India-i aiter.

Arütsülen aliba yimtsüngtem nung refugee tebilemstü tali akumba indang jembitsü atema Assam Rifles ketdangsürtemi tawa Mizoram nungi yimtsüng ketdangsürtem aser Young Mizo Association lenirtem den senden mena liasü.

2021 küm February 1 nü Myanmar nung mitkar temi sorkar atsüngdokba sülen Myanmar nungi nisung 32,000 shi Zokhawthar densema Mizoram indang district balala nung jenoka alir.



2 NAP Bn. Alichen ajanga KVK Mokokchung region den lungjemer November 19, 2023 nü unit personnel aser kinungertem asoshi ak metsüba training ka agüja liasü. Iba sentong nung shisalen sayur ya Dr. Ajungla Lipok, Dr. Sarendi Walling aser staff tem liasü. Kasa mapang konger metsüba aser alu nungi aonsotsü züsenba yimyattem sayua liasü aser mozüa lema agütsü.



November 19, 2023 nü Rajasthan kübok Dausa nung Congress lenir, Rahul Gandhi-i assembly election atema nüboyimba sentong ka nung jembidang tangokba noksa nung angur.

Election Commission of India-i BJP pusema inyaker: Sanjay Raut

Mumbai, November 19 (Agencies): Amongnü Shiv Sena (UBT) lenir aser MP, Sanjay Raut-i, Election Commission of India (ECI) ya tangar nem anishidaksür ka kümogo; parnoki BJP-i inyakba mapatem mangu ama toktsür, ta aitsü.

Raut-i, assembly election agiba state pongu nung BJP jenjang mejungi akümbe sülen BJP-i yimsü dak sendakba nung voters mesüzüksü meranger, ta aitsü.

Taoba hopta Madhya Pradesh nung Union Home Minister, Amit Shah-i, state nung BJP-i takok ngura sorkari ayongzüka nüburtem Ayodhya nung aliba Ram tekülem kidangi anir aotsü, ta nangzükbaji tamangba yimsü nung ajemdaker nüboyimba lir, ta

Raut-i aitsü. Paisa, iba oji Congress lenir kati jembida asübo Enforcement Directorate-i inyakba ama Election Commission-i party anema inyakla, ta ashi.

"Voters sübokrema vote ayimbaji taoksatsüka lir saka Election Commission-i ibaji mangu ama yutsür; iba ya democracy atema majung," ta Raut-i ashi.

"(Taoba mapang chief election commissioner) T N Seshan-i pa inyakba mapang nung, Election Commission-i ola tulu adoktsü menüngdak, saka tera dang arakzü nung yimtenren party tem tsübudaktsüsüla, ta jembida liasü. Tangbo Election Commission ya taila kümogo," ta pai ashi.

"Kechisa atalokogo (state

pongü- Madhya Pradesh, Rajasthan, Chhattisgarh, Telangana aser Mizoram nung nüboyimba mapang), ibaji ajanga Election Commission ya tangar nem anishidaksür ka, ta kuli sayuogo," ta Raut-i ashi.

Shiv Sena tentetsang, asür Bal Thackeray-i 1987 küm Hindutva onük nung ajemdaker party candidate, Ramesh Prabhu atema nübo yimtsüba ajanga pa indang vote temeden küm 6 agiena liasü aser by election nung takok angur Sena MLA tem- Suryakant Mahadik, Ramakant Mayekar aser Prabhu nung anentsü, ta Raut-i ashi.

"Parnoki (BJP) Election Commission aser tanga rejutem azüoker aser Hindutva tongbang rarar," ta paisa tai tongloktsü.

India-i maneni Palestine nungertem dangi teyari oset yokogo

New Delhi, November 19 (Agencies): Tang Israel aser Hamas telok na tsüngda maneni raraba mapang nung Gaza Strip nung timtemer Palestine nungertem asoshi India-i maneni chiyungtsü aser mozü densema teyari oset aika yokogo.

Amongnü External Affairs Minister, S Jaishankar-i X ajanga, India-i Palestine nungertem teyari maneni agütsüsü, ta metetdaksü.

Amongnü India-i Indian Air Force indang C17 tayimtsü ka nung teyari oset touzüok ton 32 bener Egypt nung aliba El-Arish Airport-i yokogo. Iba airport ya

Rafah crossing nungi kilometer 45 shi dang pilar lir. Iba crossing ajanga teyari jagi Palestine nungertem ket atongtsü.

October 22 nü-a India-i IAF tayimtsü ka nung medical oset ton 6.5 aser mozü, sleeping bags, süki, sanitary aser tzü merüktetba tablets densema teyari oset ton 32 yoka liasü.

October 7 nü Hamas kiralongrartemi Israel amakba sülen tang agi hopta tenetbuba Israel-i Gaza Strip amaker; tang tashi nung Gaza Strip nung nisung 12,000 dak tema süogo.

Gaza nung rara ajanga hospital tulutiba 'Al-Shifa' kanga mejungi kongshiogo. Totzü agi

anüngba agi hospital nung shirangertem anepalu mesüteter.

Tawa Israel sepaitemi iba hospital nung tunnel ka den raraba hadir aika anguba sülen iba hospital azüngtetjang, ta tuyua liasü.

World Health Organisation (WHO) aser UN ketdangsertemi, iba hospital ya nisung tepsetba tesem ka kümogo, ta sangdongogo.

Iba hospital nungi shiranger karbo anir oadokogo saka tang tashi tanur 32 densema shiranger ajak senteper 291 shir lir, ta Amongnü UN ketdangsertemi metetdaksü.

Tunnel agi nembanga alirtem anogo ana tsüngda kümzüksü: Gadkari

Dehradun, November 19 (Agencies): Amongnü Union Road Transport & Highways Minister, Nitin Gadkari aser Uttarakhand Chief Minister, Pushkar Dhami nati Uttarkashi district nung 'tunnel' chirepba tesem semdanga ali agi anenbanga alirtem kümzüksü atema inyakba maparen asadangogo.

November 12 nü Uttarkashi nung 'tunnel' tesem ka chirepba ajanga yangji mapa inyaker nisung 41 anenbang aser tanü agi anogo tinübuba mekümzükteter.

Amongnü anepdang iba tesem semdangba sülen Union Minister Gadkari-i, advanced drilling machine ka ajanga kümzüksü aser taruba anogo ana tsüngda parnok kümzüksü, ta metetdaksü.

Osangbenertem den jembidang pai, "Onoki state nung aliba agencies aser Swiss agencies teyari agia inyakdar. Auger machine ajanga mapa shidak inyakra taruba anogo ana tsüngda onoki mapa inyakerterem atongtsü," ta metetdaksü.

Tunnel agi anenbanga aliba

aayanger 41 kümzüksü atema vertical drilling machine amshidar; kümzüksü maparen inyaksü atema sorkar aser nija agencies aika ayongsemogo, ta pai ashi.

"Onoki America nungertem den-a tongtepratepogo. Onoki robotics amshitsü. Geological Survey of India team kati tunnel telungji 'scan' asütsü atema satellite images bushidar. Onoki akokba tashi ajak ayongsemer inyaksü," ta paisa metetdaksü.

Gadkari-i, "Mapa inyakerterem nem chiyungtsü aser nungdak balala agütsüsü atema inch 6 pipe ka inokogo. Iba pipe ji ajanga onoki chiyungtsü, mozü, tzü aser oxygen tali agütsüsü. Tang tashi nungbo chiyungtsü takong dang agüja lir saka pipe tasenbaji ajanga 'roti' den tanga chiyungtsü yoktsü," ta metetdaksü.

Mapa inyakerterem atongtsü atema tajungtibaji Auger machines lir aser tang tashi nung ali telunglen metre 42 tashi perü-a iogo; mapa inyakerterem tonga ali perü-a aiba sülen pipe ka inoktsü aser ibaji ajanga mapa inyakerteremji kümzüksü, ta paisa shisem.



November 19, 2023 nü UAE nung Dubai Air Show 2023 nung shilem agir Indian Air Force (IAF) nungi sepai kar noksa nung angur.

Maldives-i India dang archipelago nungi sepaitem agientsü mepishi

New Delhi, Yimpoksuüi/ November 19 (Agencies): Maldives nung sorkar tasenbai India dang sepaitem Maldives nungi agientsü mepishiogo.

Maldives sorkari sangdong ka ajanga, "Tir Dr. Mohamed Muizzu-i Indian Minister of Earth Sciences, Kiren Rijju ajuruba mapang nung pa dang Maldives nungi India nungertem sepaitem agientsü mepishiogo," ta metetdaksü.

Indian Ocean Region nung India atema tongti kidangertem rongnung Maldives densema lir. Tesüiba küm ishika tsüngda India aser Maldives na tsüngda defence aser security densema kanga junga kümogo.

Maldives Tir tasenba, Mohamed Muizzu-i election atema nüboyimba mapang nung pai nüburtem dang archipelago (asetkongtem) nungi India

nungertem sepaitem aienshidaktsüsü, aser pai ibaji yimtenren ajanga inyaksü, ta nangzüka liasü.

Taoba ita Maldives Tir election nung Mohamed Muizzu-i Tir teinyakdak, Ibrahim Solih madak takok ngua liasü.

Honibarnü Union minister, Kiren Rijju-i Mohamed Muizzu ajurua senden amenba mapang nung pai, India-i Maldives den amalitep jenjang tashi itshitsü atema inyaksü, ta metetdakja liasü.

Senden tembangba sülen Rijju-i X ajanga, "Tir H.E. Dr. Mohamed Muizzu ajuruogo. Ato kilonser @NarendraModi-i salem shiokba metetdaksü aser India-i maneni linük ana tsüngda amalitep jenjang tashi itshitsü aser linük ana nüburtem tsüngda tesendaktep tajungba akümtsü atema inyaksü ta shiogo," ta metetdaksü.



November 29, 2023 nü Indira Gandhi Memorial Museum, New Delhi nung taoba mapang Ato kilonser, Indira Gandhi asoba anogomong nungertem nung ayongzüksü sentong ka nung telok kati shilem agiba noksa nung angur.



TIR YIMYIM YIMOBILEM (EDITORIAL)

DIMAPUR TENTONÜ, YIMPOKSÜI (YIMPOKSÜI) 20, 2023

Sayuyim tasen

India ajaklen kaketreju ajak nung sayuyim kasasa asütsü asoshi center government-i 2020 küm kaketshisatsü sayuyim, National Education Policy, tasen ka lateta lir aser ibaji school nungi tenzüker college aser university tashi nung sayutsü tenzüko. Atangji, iba sayuyim tasenba yangluba mapang kaketrejutem nung tesayur mongin aser nübortem aikati ronga atua aitsüba shilema liasü, kechiyong iba sayuyim tasenba nükjidongji linük nung akhidang yimsüsüa aruba otsütem aser tamangba yimsü tsütsü kanga atsünga oa melenshitsü apusor amai reprangtet aser aji oda sayuyim tesem aika nung yamaji melenshir sayutsü merangdagi. Ajisüaka, sayuyim tasenba, National Education Policy, 2020, nung ya tazünger kaketshirtem tangazüksü aser tagitsü tasen aika aremokja lir. Akhi sayuyim repringdangra, kaketreju nung pei taküm lia aotsü atema nungdakba mapatem sayubaren kangabo mali asü. Ibayongji, talisa asen lima nungbo tazüngerterem dang nungibo mazüngerteremang mapa tekaraba aser tajungba angur. Ibaji tazüngdak kaketreju nung sayuba aser angazükba dak keta lir. Aji oda, akhidanga school nung süng mapa inyaksü aser sü mechitsü sayuba sentongtembo liasü saka tanü asüngbo itemjia mesayui anener lia, tang iba sayuyim tasenba tenzüker. Tang kaketreju nung sayuyim tasen tenzüka nung akhidang ama oshioben, otsüolem, mulungdangtsü, ongko aser science ama subject-tem agiba den külemi school azüngdang nungi tenzüka college tashi nung engine oset yanglubatem, süngdonglidong aser tzu mopong nungi tashi (energy) agizükba, aluyimba, shiruru metsüba aser kiojen anepaluba aser anema alitsübayim indang lesson-tem pei jangraba apir angazüksü atema sayuyimtem renema lir. Anungji, tangbo class ter ajangtetdang yongi zülutsü, tangar oshi jembitsü aser ongko inyak metetba dang masü saka pei teka agi senotsü ajangzüktettsüa teka mapa langkabosa inyak shir asütsü. Iba jagi mapa manguba tebilemsü meiloingi samaa aotsü. Tang tangbo, talisa, asen lima nung kanga junga azüngerterem kar government mapa nung ketdangser mesüra clerk mapa inyaksübatem angutsüba dak alaka matriculate aser graduate asürtemjibo yutsür post graduate aser doctorate degree angurtema dena mapa mangur, kechiyong parnoki zülutsü, azüngtsü aser jembitsü ashiba dak alaka inyaksübo kecha mashi aser tanü limai zülutetter, züngtetter aser jembitettertem dang nungibo mapa inyaktettertemang tenüngdakba, anungji tanübo item nungdakji meteta sayutsü, azüngtsü aser angazüksübaji kanga tongtibang kümogo. Iba nungdak ya kodang asenoki angatetdir, yimtak yimtsüng aser town nung aliba kiyong yimten tashi agi pei pei alidak government school-tem sayuyim tasenba ya tenzüksü asoshi ajungshitsü aser yariteptsü. Atangji, iba sayuyim tasenba tenzüka sayutsü atema kaketreju nung takdang talila nungdaksü aser schook temeket nung aluyimtsü aser shiruru metsüba angazüksü atema alia tuluka nungdaksü. Itemji yimtak yimtsüngtem nungbo school compound nungsa masüyonga school nungi tatsüka pilar school atema alumang ka alitetra ajisa tajungba asütsü. Iba sayuyim tasenba ya government school nung dang masü saka private school ajak nung tenzüksü, anungji private school-tem nunga iba sayuyim tasenba sengtong atema ali aser class takdang peria alitsü nungdaker. Tanü asüngbo zülutsü, azüngtsü aser jembitsü angazüksü atemabo school-i aotsü menüngdaker, kechiyong itemjibo kidang angazükadoker, anungji school-i aobajibo mapa inyaksü angazüki yoker ta tsüraburtemia bilemstüla aser kaketshirtem daka iba tangatetbaji alitsüla. Iba sayuyim tasenba tenzüka ajanga kaketrejutem ya, akhi asenok ariju ama, mapa angazükdak aser mapa inyakdak reju kümogo. Asenoki, iba sayuyim ya yakta agizüka kaketrejutem nung tenzüksü merangtsüla. Koma karaa tenzüktetdir, yamaji asen lima renlokba nung karatsü.

OLEMSABANG

Khristar arogo nungbo telemsa kecha malitsüla

~ L. Kika Pongener.

(Yashi adok nungi...)

Tanü asen lima nunga, arogotem nung tenzüker o tenzüker tsüngda meputepba aser Ministry-tem tsüngda nunga tesendaktep tajung maliba, mesura nisung o nisung na tsüngda nung kati ka majinutepba agi, Tsüngrem o-a dena nisung o ama kümdaktsür, arogopur karbo tekülem sentepi arutsüa mejangraba-a alitsü akok. Aji oda, kari yamaji angateter, tamang nung atsüngzüka oa lira, ajibo kangasa tangatetba tila asütsü, kechiyong asenok ya nisung amanger masü, saka Tsüngrem dak amangertem lir. Kechiba asenok nisung dak mettsüdaker asen tanela jenjang Tsüngrem nungi pilaa aotsü...??? Mesura kechiba asenok nisung kar meji Tsüngrem tsüngdang sentsüh-tsür akümtsü...??? Aji oda, Tsüngrem lar/tenzüker tema, karbo nisung dak mettsüdaker, pei mapa nung tim teinyaktsü meinyak, pei mapa nung tapok adokdakja aser tamakok aludakja ali asü...??? Mesura arogo inyakyim nung asen mulong masüba kar meji, pei mapa nung tezü danga tamakok aludakja ali asü...??? Mesura rongsen ketdangsuba mapa nung teka amuoka ketdangsuba maangka manguba agi tezü danger, pei mapa nung temulong magutsü ali asü...??? Mesura Tsüngrem dang nungibo nisung tongtipangba sudaktsür asü...??? Mesura Tsüngrem peladaktsütsüba dang nungibo asen tajangzük angutsüba-ang kanga agi tongtipangba sudaktsür asü...???

Aji oda, asenok Tsüngrem tenzüka aser amangba ya nisung peladaktsütsü atema tenzüker aser amanger masü, saka Tsüngrem mulong chidaktsütsü atema tenzüker aser amanger...ta angatetsüla. Tsüngrem oi ashir, "Kechiyong ni nisung temulong chidaktsütsü bushir asü ? Mesura Tsüngrem peladaktsütsü ? Ni nisung peladaktsütsü meranger ama ? Ni nisung peladaktsüra ni Khrista lar masü" (Galati-1:10). "Nenoki kechisa inyakdir aji nisung dang masü, saka Kibuba dang temulong ajak agi inyakang. Kechiyong nenoki Kibuba Khristaji tenzüker" (Kolosi-3:24-25). Ano Tsüngrem tenzüka ya, asenok rongsen tajangzük angutsü atema tenzükerba masü...ta angatetdi. "Shingaia kibur ana metenzüktet"... "Nenoki Tsüngrem aser rongsen metenzüktet" (Mathi-6:24). "Parnok Tsüngrem pei tepok lir...Aser parnoki alima oset indang bilemer; Saka asen senso kodak nung lir" (Filipi-3:19). Atangji, Tsüngrem tenzüka ya pei tepok mesutsü atema tenzüker masü...ta angateta... Anibelem aser takoksa jenti liaka...item ajungaji aremzüka bendanga agutsür tenzüksüla.

Temeim arogo nung tenzüker aser arogopur tajungtem...Asenok Tsüngrem tsüngdang sentsüh-tsür masütsüsa aser küm talangka tenzüka/amanga arur Tsüngrem nungi temoatsü angutsü melena, meyiper semchi-semnur tashi atakadem-ang angutsüsa tenzüktetra aser amangtetra...koda tesusatsüka asütsü. Tsüngrem oi ashir..."Saka nai ajak nung teshisadangba liang, timtem aremang, sayutsüngir mapa inyakang, aser ne tenzüka mapa abensa-ang" (2 Timoti-4:5). Anungji Tsüngrem tenzüker ajaki Eli Putir ama temoatsü melena atakadem mangutsüsa atendena, tsübuseta tenzükti.

MOLUNG NUNGERTEM NEM ASEN AOR ASER NAGA KIN AJAKI TENÜNGSANG AGÜTSÜDI ARUNG

~ Temsuramok Jamir, Salangtem Ward Mokokchung

1972 ABAM Centenary 100 year amongdang Rev. Kijongi züluba Nokinketer Mongjen nungto Oboula nungeribo Tematiba Tsüngrem Sibsagar asen lima atena tajai ao. Oboula Süpongmeren-i anir parnok nisung 24 Dr. Clark-i Dikhu ayong nung baptitsü. Aser Dikhahaimong nung ajaki mulunga Dr. Clarkji süngra satem nung mendaktsür nokinketer sobutsü sobur nisung 60 (sixty) tejaklen 30 aser tesülen 30 ta agi washia meiner par süngküm atong.

Iba anogoji Dr. Clark-i pa korang semzüka ali nung apudaka sarasadema tematiba Tsüngrem peladaktsü. Iba temoatsüji tanü tashi asen kin nungi magieni lir, anungji lokti aser kijai meküptepi kotaki aotsüang renemtepdi arung ta o tatsü agi ayongzüker. Tazünger ajak Tsüngremi moajang.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Shin otem atalokdar; Khristanem renema alitsüla: Jerry B. Jenkins



Jerry B. Jenkins

November 19, 2023: Kaketzülor nungtugu, Jerry B. Jenkins-i, Laishiba nung tatembang anogo atongtsü mapang anasa tataloktsü balala shinzüka aliba atalokdar, anungji Khristanem renema alitsüla, ta metetdaksü.

"The Chosen" kakettem zülusang, Jenkins-i tang Israel aser Hamas na tsüngda raraba ya Khristanemi ngudar; tang mapang ya Laishiba nung shinzüka aliba atalokba mapang lir, ta ashi.

"Iba ya tejangja. Shin otem ajanga tesem ajaklen nungi Israel amaktsü indang shia lir, aser iba ya tang ataloker ama reprangteter. Shin o nungsa

North tsütsülen nungi Great Bear aser anüdoklen nungi sepaitemia (Israel) amaktsü indang shinzüka lir," ta pai metetdaksü.

"Dr. LaHaye süadoker küm tenet jungogo, pai Great Bear ji Russia aser anüdoklen nungi sepaitemji China asütsü ta amanga liasü. Ibaji shidak, ta ashitsüsa kuli tejangja aika lir. Asenoki itemji repranga atatsü nungdak," ta pai ashi.

Jenkins aser Tim LaHaye nati senteper kaket 16 tashi züluogo. Tenati züluba Premillennial apocalyptic kakettemji Jungkai Adok kaket ajanga ajunghia züluba lir.

Jenkins-i, Yisu Khrista

tanaben alimai arutsü mapangji shingaia memetet, ajisüaka LaHaye-i tarutsü atema takzüteta alibattem karbo tang atalokdar, ta ashi.

"Khrista tanaben alimai arutsü anogo mesüra ghondaji shingaia memetet; Tsüngrem Chir (Yisu)-ia memetet. Pai (Yisu)-ia memetet, anungji asenoki Khrista tanaben aliba arutsü mapang taakzütsü merangbajibo sowar mapa asütsü. Ajisüaka Khrista tanaben alimai arutsü mapang anasa ataloktsü shinzüka alibattembo tang atalokdar," ta paisa metetdaksü.

"Anungji shinga tesülen atsüngzüka meyütsütsü atema parnok dang ochi ashitsüji asenok teinyaktsü mapa lir," ta pai ashi.

Jenkins-isa Khrista dak amanger ajak dang Khrista osangtjung lemsateptsü aser Khrista tanaben alimai arutsü atema ajak renema alitsü ayongzük.

"Laishiba nung ashiba agi Tsüngremer mapangbo 'Anogo kaji küm meyrjang ka aser küm meyrjang kaji anogo ka'. Anungji Pai anogo ka asenok atasüra Pa taohiji ano küm meyrjang ka tali asütsüa akok. Anungji nisungtem renema lidaktsütsü atema asenok asoshi mapang peria alitsü. Ajisüaka ibaji tanü asütsüa akok, anungji asenok renema alitsüla," ta paisa ayongzük.

Translation Agency kati Laishiba meyipba maparen nung Arogo yarir

November 19, 2023: Laishiba meyipba agency kati alima tesem ajaklen, talisa Khristanem alitsü majungba linüktem nung Laishiba meyipba tsütsü Arogotem yarir.

Laishiba meyipba agency 'UnfoldingWord'-i Iran densema alima tesem balala nung Laishiba meyipba maparen nung Khristanem yarir.

Tawa interview ka nung jembidang UnfoldingWord nungi Evan Thompson-i alima tesem balala nung pei oshi nung Laishiba malirtem aika lir, ta metetdaksü.

Thompson-isa, "Tang alima nung nütsüng billion 1.45-i oshi 5,500 shi jembir aser item oshi nungji Laishiba rangben (Lai ajak) mali. Tesüiba küm 20 tsüngda Arogo kanga inogo," ta ashi.

"Nai Arogo ka tenzüktettsü, ajisüaka Arogo ket nungji pei oshi nung Laishiba melira iba Arogoji putu ka dang alitsü. Tatishitsü agi, Iran nung underground Arogotem lir aser alima tesem balala nung underground Arogo meyrjang aika lir," ta pai ashi.

Alima nung Laishiba meyipba agency aikati mapa tajung inyakdar, ajisüaka Laishiba meyipba agency temi bendangleni nübo yoktsüsa antiölen linüktem nung Laishiba

meypertem kanga ajema kümogo, ta paisa metetdaksü.

"Iba ama timtem bentettsü atema unfoldingWord ya tentet. Onoki iba dang ya Arogo tiyongtsü südaktsüba Bible translation ta ajar," ta Thompson-i ashi.

"Laishiba agi mayimjemba aika kiyongertembo Khristanem lir, ibayongji parnoki parnok den Khrista osangtjung lemsateper. UnfoldingWord-i oshi ajak nung Laishiba meyiptsü atema Arogo den inyaker," ta pai metetdaksü.

UnfoldingWord-i Arogotem den Lai meyipba nung yariteptsü atema Arogo nem open-source software aser open-licensed biblical contents agütsür, ibaji ajanga 'copyright' tetsükdaktsü agienadoker, ta pai ashi.

"UnfoldingWord-i Zoom ajanga Laishiba meyipba teams nem training agütsür aser tesem kar nungbo tsüngdong oa training agütsür. Linük kar nungbo Laishiba meypertem kümzüktsü atema training agütsüba tesemji mimshir," ta pai metetdaksü.

"Onoki Laishiba memeyiptsür saka Laishiba meyiptsüpurtem nem training agütsür, kechiyong alima tesem ajaklen Arogoi ibaji dang nungdaker," ta paisa shisem.

ANOGO ABEN TSÜNGREM DEN

Tepela tanela

Yohan 14: 16-26

Tanela Temeshiji asenok süneptsür aser Teyarir asütsü asoshi Tsüngremi ajemalu posü ama yok. Pa mejashidaktsütsü saka peladaktsütsü asoshi tanü asenoki mapa terok shisadangi.

Tanela Temeshiji teshisadang akaba Tanela lir (Isa 11:2). Asenok nükdang junger ta bilemba lelang karibo asenok tesamadaki anir (A.Shin 14:12). Tanela Temeshi-i tetenzük nungi tatembang metet nung Pai asenok Tsüngremi mulungba teyong alitsü yarir aser Pa peladaktsüba lelang nung asenoki anir. Asenoki temulungjang ajunga agi Tsüngremi mulungbaji agizüktsüla iba jagi Tanela Temeshi peladaktsür.

Tanela Temeshiji "Tasen Tezüngzüktepba" Tanela lir (2 Kor. 3:6). Pai asenok Tejen Lai ozüng talenba nungi kümzük. Kodang asenoki ozüng nung tesülen shitsür aser Tanela Temeshi agütsüba nüji nung lidir iba jagi Tanela Temeshi peladaktsür.

Tanela Temeshiji "Tashi" Tanela lir (Zek. 4:6; Lk. 24:48; 1 Kor. 2:3,4). Kodang asenoki asen tashi, temetetba aser rongsen nung temulung melemi Tanela Temeshi teyari bushidir, Pa pelar.

Tanela Temeshiji "Khrista" Tanela lir (1 Peter 1:10-12; J. Adok 1:9,10). Asenoki kodang tarendakba mesüra akmesen meli-i Khrista indang kuli südir Pa pelar. Tanela mapaji Khrista sentsüwangshidaktsütsüba lir (Yn. 16:14).

Tanela Temeshiji "Kotaker Tebu" Tanela lir (Isa. 63:8-10). Kodang asenoki Tsüngrem asenok "Abba" ta agizükdir Pa pelar. Tanela Temeshiji "Kotaker sentsüwangshi" Tanela lir (1 Peter 4:12-16). Iba lima nung shinga timtem nungi jenbua mali. Tanela Temeshi-i asenok timtem ken agi melentsür. Tanela agi sünga alibaji asenok asoshi temoatsü aser Pa asoshi tepela lir!

Tejashitsüji ya, kodang asenoki Pa jashidaktsüra Pai asenok metoktsür. Saka asenoki Pa maneni jashidaktsüra Pa "remseper!" (1 Tesa. 5:19). Tsüngrem tesülen aliba ser asenok mulungjang nung Pa mokorai alibaji bilemdangang!

Oh! Taküm Tsüngrem Tanela, Na tesangwa aser mi Tsüngrem lir. Jangruang, mi tashikang jangruang Onok tepang mechitem temeim aser tejangraba milak agi süngjang.

Ajak dang Ne osangtjung sayutsü Tsüngremer sentsüwangshi arok rongsen.

Arizona nung lenmang nung sayutsüngia jajar ka dak injang khaloktsü



Hans Schmidt aser pa kinungtsü na noksa nung angur.

November 19, 2023: Glendale, Arizona nung lenmang nung sayutsüngi jajar Arogo lenir ka dak nisung kari tekolak nung injang khaloktsüba sülen pa kanga mejungi yirur lir, ta International Christian Concern (ICC)-i metetdaksü.

November 15, 2023 nikongdang 6:15 ako meta arrshi küm 26, Hans Schmidt-i lokti aliba tesem ka nung megaphone amshia sayutsüngiba mapang nung nisung kari pa dak injang khaloktsü.

Schmidt ya Victory Chapel

First Phoenix nung outreach director inyaker, aser pai mapang shia yimti-yimdong nung sayutsüngia jajar.

Nisung kari gari nungi mesüra süisüponger kari pa dak injang khaloktsü südi, ta ketdangsertemi melung melemi bilemer. Ajisüaka tenük kuli alirtemi ashiba agibo, nisung kari gari ka nungi Hans dang o tamajung shia süi aser lenmang nung tesenzü ta pa amokmerena liasü.

Victory Chapel First Phoenix Arogoi sangdong ka ajanga, "Hans yirua ER-i anir ao aser CT scan agiba ajanga pa dak injang khaloktsüba jangja. Pa süchia ao tenzükogo. Pa temang terabo arakzür saka pai meteta teamng arakzür asü masüar doctor temi mejangja aser pa tekolok nungia tzü ayim tenzükogo. Pa kanga mejungi lir, anungji pa atema maneni sarasademjang," ta mepishia metetdaksü.

Hans aser pa kinungtsü na tanur ana sosema lir. Tamalen pa sepai nunga liasü.

AO OSHI ANGAZÜKDAK: TANÜ ANGAZÜKTSÜBA OJANG



Semshirongnü

(n) süchir aser mangkoleper nü (warrior's and richman's decorated spear)

* Tanü putu nunga langa alirtemibo iba semshirongnü ya amshitsüla.

Semtak

(v) molokmetok aser osettsüset sentaka ayuba (keep hanging on a peg)

* Taliba kidang semtak ayutsü atema takdang tuluka nüngdaker.

OLONG PAITEP # 6619

1			2		3		4		5
6		7							
					8				
9				10					
						11			
			12						13
	14							15	
					16				
			17						
								18	
19									

TIPILEN

- 2. Teburtemi tejak nung awaba - (8)
- 6. T ___ em - (3)
- 8. Tzük ayudak - (3)
- 9. Nüngdakba dang timba - (6)
- 11. Züina ao - (4)
- 12. Yangi tzü angur - (5)
- 14. Tangar dang nungi tali - (4)
- 16. Senyong masü - (6)
- 17. Oadokdi - (3)
- 18. Tzü tarok - (3)
- 19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
- 3. Nisung ka mapa inyaksü nübo - (4)
- 4. Azüntsü asoshi mejemba - (6)
- 5. Tesangwa agütsüba - (5)
- 7. Tila masü - (4)
- 10. Tebenjem tetsür chanu - (4)
- 11. Tekolak nung inok - (4)
- 12. Tetsüngda - (6)
- 13. Tangar inyakba ka inyak - (6)
- 14. Tim masü ta ashi - (5)
- 15. Asalendong - (4)
- 16. Tanü dangtsü - (4)

OLONG PAITEP # 6618 TELANGZÜBA

TIPILEN :

- 1. Telok, 4. Aluru, 6. Ozüng,
- 8. Emk, 9. Kin, 10. Teti, 12. Süir,
- 13. Jen, 14. Ola, 16. Talak,
- 17. Mazük.

LANGTSÜNGLEN :

- 1. Tenükjang, 2. Luden,
- 3. Kiochtsü, 5. Lenti,
- 7. Tajangzük, 11. Teronem,
- 12. Sempa, 13. Jahaz.

Happy Birthday

TENÜNG : SENTIRENLA AIER
KÜM : 5
Anogo : 20 November
Talidak : United Colony, Dimapur

Happy birthday Sentiren. Tsüngremi arishi talang den nü taküm temoatsü aser takok nung len aniangma ta onoki na asoba anogo nung sarasadema amonger.

Temeim nenu Yimkümer, Oja, Oba aser Otsü o Obou nunger.



Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

- 1. Tenüng :
- 2. Tasoba anogo:
- 3. Küm : 4. Class :
- 5. School :
- 6. Talidak :
- 7. Salem osang :

Tepela Tasoba Anogo



Manipur nung KYKL züngsem tasen 5 temai adok



Imphal, November 19, 2023

(Agencies): Imphal, Manipur nungi kilometre 47 shi pilar Pallel nung Kanglei Yaol Kanna Lup (KYKL) züngsem pungu temai adok.

Assam Rifles-i yaria KYKL züngsem tasen pungu temai adok ta AR sangdong ka nung metetdaksü.

Pallel nung parnok tsüraburtem lia Manipur Police tsüngdang temai adok ta AR-isa ashi.

Myanmar den arrtsü anasa aliba Tengnoupal district nung Shaibol Company Operating Base (COB)-i yaritepa KYKL

züngsem tasen pungu temai adok.

Par pungu ya Kakching Relief Camp nung village volunteers inyaksü atema ao. Ajisüaka parnok ashioktsür Indo-Myanmar arrtsü anasa KYKL züngsemtem ket nung agütsü.

Telungpur teseptem nung par pungu kanga mejungi ayu aser mapa inyakdaksü ta AR-i ashi.

Parnok timtema aliba den ano arrtsü adena orr training agütsü tsübuba agi November 15, 2023 nü par pungi tesept toktsür jena ao.

Par pungu samaba osang

angashiba sülen lanur pungu tsüraburtemi Thoubal nung paramilitary forces nem osang sangoktsü aser tanurtem kümzüksü mepishi.

Tengnoupal nung aliba Assam Rifles Battalion nem lanur pungu indang contcat number aser tanga osangtem metetdaksü. Iba sülen Assam Rifles-i lanurtem aliba tesem bushitet aser parnok anir arutsü atema search parties yok.

Yasüng parnok kümzüksü asoshi mapa ka inyak aser idangji parnok nguteta COB Shaibol-i anir aru ta Assam Rifles-isa metetdaksü.

Assam nung taila hon ayokba atema tebu o jabaso na apu

Guwahati, November 19, 2023

(Agencies): Assam kübok Lakhimpur nung taila hon agüja nisung ashioktsür tebu o jabaso na dena nisung 3 apu.

Par aseme Jharkhand nungi nisung ka ashioktsü. Ita ka tejakdang Guwahati nung parnok hotel ka nung

customer ka dang taila honi yangluba oset ka ayokbaji CCTV camera nung tangoka lir.

Tebu o jabaso na den tanga nisung kati Jharkhand nungi aruba nisung dang Rs 3.5 lakhs meshia agi aser pai Paltan Bazar Police Station nung par asem anema ken o

ka benoka liasü.

Iba ken o nung ajemdaker Bangalmora police-i Honibar aonung Mofizul Islam, Atiqul Islam aser Bilal Hussain nunger apu.

Mofizul aser Atiqul Islam na ya tebu o jabaso na lir. Par asemprong Paltan Bazar Police ket nung yua lir.

Hindu nunger kati mosque lenmang yanglutsü atema ali tenla

Guwahati, November 19, 2023

(Agencies): Assam kübok Bongaigaon district nung Hindu nunger kati mosque kati aotsü lenmang yanglutsü atema ali tenla agütsü.

Dolaigaon nunger Ratikanta Choudhury-i temeim sayua pa indang ali tenlaba atema nisung ajaki tushir.

Choudhury-i atsüayong kecha melii dang mosque society nem lenmang yanglutsü atema pa indang ali agütsü.

“Iba ali nung onoki alu ayim. Lia arudang iba tesem nung

nisungtem adenshi aser mosque ka yanglu. Nisungtem maneni yangi arutsü ta ni bilem aser iba jagi nisungtemi melamela mosque-i oa sarasadem sütettsü atema lenmang ka yanglutsüla ta ni angatet. Ni iba atema sen kecha memeshi, ni tenla agütsü” ta Choudhury-i ashi.

Dolaigaon nung aliba Muslim nungeri parnok aliba kiyong dang Prabhavati Nagar ta jaogo. Iba ya Ratikanta Choudhury tetsü nüngtem ung ajaba lir. Choudhury-i pa asoshi mebilemi Muslim nunger yariba

ya iba tesem nung teti atema telok balala putepa alitsü tatishitsü tulu asütsü ta Muslim nungertemi ashir.

“Assam nung ibala tatishitsü tajung atalokba atema pelar. Asenoki item tatishitsü prokshitsüla aser tangalen nungi asenok tsüngda meputep adokdaksütsü merangaka makoktsü. Onoki pa aser par kibong dang kanga pelar. Pa tenüng tajung teti iba yimsüng nung alitsü aser teti bilemtettsü” ta Muslim lanur kati ashi.

Meghalaya police-i Rs 1.75 crore alang heroin apu

Shillong, November 19, 2023

(Agencies): Meghalaya nung East Khasi Hills Police-i mozü shibelener ka apu aser pa ket nungi Rs 1.75 crore alang heroin ngutetogo.

“East Khasi Hills Police-i anibelem arema drug trafficking anema mapa inyakba atema tenüngsang agütsür. Yasüng parnok mita aodang mozü shibelener ka aser Rs 1.75 crore jenjang heroin apu. Kasa anogo nungsa parnok iba mesükba heroin apu” ta Meghalaya Chief Minister Conrad Sangma-i metetdaksü.

“Director General of Police Dr. L.R. Bishnoi lenisüba



kübok Meghalaya Police-i drug networks samatsütsü atema mapa inyaker. Iba takok anguba osangtem ajanga ozüng amertem aser lokti tesentaktep lia mapa inyakba kuli sayur” ta Chief Minister Conrad-isa ashi.



Nov. 19, 2023 : Mombasa, Kenya nung anogo ana tzunglu kanga sashia aruba sülen ki kar tzü agi mubanga aliba noksa nung angur. Kenya north tsütsü aser linük yimtiba Nairobi nung tzunglu tanen makai aruba ajanga tesem aika nung tzümetzung adok aser tang tashinung nisung 46 takum samaogo aser 36,000 shi pai ki yutsür tesem balala nung jenoka lir. Nov. 19, 2023 : Mombasa, Kenya nung anogo ana tzunglu kanga sashia aruba sülen ki kar tzü agi mubanga aliba noksa nung angur. Kenya north tsütsü aser linük yimtiba Nairobi nung tzunglu tanen makai aruba ajanga tesem aika nung tzümetzung adok aser tang tashinung nisung 46 takum samaogo aser 36,000 shi pai ki yutsür tesem balala nung jenoka lir.

Russia-i drone amshia Ukraine nung tesem balala amak

Kyiv, Yimpoksüi/November 19 (Agencies): Russia nunger indang drone temi manger mesangwa tsüngda Ukraine nung infrastructure facilities balala amakba sülen linük south, southeast, aser north len jila aser yimtsung 400 dak tema nung electricity maka kumogo, ta Ukraine nunger ketdangsürtemi metetdaksü. Hokolbar aonung 8 ako nungi Honibar anepdang 4 ako tashi nung Ukraine kubok tesem balala nung Iran nung yangluba Shahed drone 38 nungi 29 tashi khazüka yokba atema tir Volodymyr Zelenskiy air force nem tenüngsang agütsüogo. "Nenoki kanga mezünga drone tem khazüka yokba ya Ukraine atema taküm lir," ta Zelenskiy-i ashiba den, "asükwatonga arudar anungji Russia nungertemi tesashiba amaktsü merangtsü," ta tekümdangtsü metetdaksü. Tesüiba asükwatonga mapang Russia-i missile aser drone

noklang aika yoka nisung million aika kanga asükwatonga mapang electricity, heating aser tzü agi kanga anünga liasü. Energy ministry-i ashiba agi, linük tenüngdakba peridaksütsü atema system nung electricity peria lir, ajisüaka drone-i tesem balala maka grid tem raksatsüba ajanga consumer 1,550 power makai aküm. Ministry-isa, Russia-i drone amshia tesem balala amakba ajanga south len Odesa tesem nung aser southeast Zaporizhzhia tesem nung jila aser yimtsung 416 nung power makai aküm, ta metetdaksü. Taküm Ukraine nung tanga mapa ama masü autumn kanga talem liasü. Ajisüaka mopung ketdangsürtemi nüburtem aser shishilembar tem dang Russia-i amaktsü aliba atema renemshia atatsü asoshi metetdaksüogo. "Onok anisungzüksü asoshi mapang mali," ta power grid operator Ukrenergo tekolakba

Volodymyr Kudrytskiy-i Ukrainian TV dang ashi. "Taküm asükwatonga mapang Russia-i energy infrastructure tem amakba nokdangtsü atema energy worker aser defence force tem renemdar," ta paisa ashi. Energy ministry-i ashiba agi, Odesa tesem nung oil refinery ka dak kongshio. Drone amshia amakba mapang administrative building ka raksatsü aser civilian ka yirua liasü, ta south military command-i Telegram messaging app sangdong ka ajanga metetdaksü. North len Russia aser Belarus den artsü nung aliba Chernihiv tesem nung infrastructure building ana rakaogo, ta military-i ashi. Energy ministry-isa, Chernihiv tesem nung jila aser yimtsung trok nung power maka kumogo. Drone tem yagi ano Kyiv maka liasü, ta ketdangsürtemi ashiba den linük yimtiba leni oya aliba drone ajak yimti matongdang tsüngda khazüka yoka liasü.

KIBONG KÜMER KÜM 60 AJUNGBA TEPELA

"Arishi talang agüja ni pa jangratemdaksütsü aser kü tekümtet pa dang sayutsü." Tenüngsang Ken 91:16



Mr. Mrs. Purchiba Ozukum

Tsüngremi kanga meimba kuli tanü Ojala aser Obala temeshi kiyimba kum 60 tashi arishi aser taküm tajung moatsü yong Pa nem tenüngsang agütsü. Nena akhüm nung ner jala-jabasotem aser semchir-tanabubatemi tetushi agüja, Tsüngremer temoatsü teti lidakjang ta sarasadema amonger.

Philippines menoknok lendong nung asür 8 jungogo

Manila, Yimpoksüi/November 19 (Agencies): Philippines anüolen tiplen anokba 6.7 magnitude menoknok lendong nung asür nisung ti jungogo, ta linük indang civil defence-i Deobarnü sangdong ka ajanga metetdaksü. Mindanao asetkong nung Hokolbarnü menoknok anokba sülen anentsü lendong ka nung nisung ana samara aliba anaprongla süogo, ta Civil Defense office-isa metetdaksü. Tesüsabuba nisung ana asüba indang osang agütsüba ya Sarangani province nungi liasü. Menoknok lendong nung asür tangartem ya South

Cotabato aser Davao Occidental province nungi liasü aser tremor ajanga nisung 13 tashi yirua liaüs, koba ajanga nisungtem ano kanga aoksatepdaksü aser ki 50 dak tema raksaja liasü. Tesem aika nung electricity makai aliba yanglushitsüogo aser lenmang timba gari senzütettsüsa merektettsüogo, ta agency-i ashi. Philippines nung mapang shia menoknok anoker, kechiyong iba linük ya Pacific "Ring of Fire" nung amenoka lir, koba U.S. Geological Survey-i ashiba agi, alima nung menoknok aser volcano timtiba ataloktsüba tesem ka lir.

Gaza nung aliba al-Shifa hospital ya 'death zone' ama lir: WHO

Gaza City, Yimpoksüi/Nov. 19 (Agencies): World Health Organization (WHO) ajanga Gaza City nung aliba al-Shifa hospital semdangba sülen iba tesem ya "death zone" lir ta ashi. Israel mitkar temi amokbanga aser yangji aliba nisungtem anizüker aoba sülen WHO-i anir UN telok kati iba mozüki ya mapang ghonda ka agia asadanga liasü. Parnoki ashiba agi, yangji bomb pokloksüba aser injang khaloktsüba kuli angu aser mozüki aitdak tesem nung nisung aika aremba angu. Iba leper nungya nisung 80 rema lir ta parnok dang ashi. Iba tesem azüngtsütsü Israel army temi totuyuba agütsü ta iba mozüki director-i ashir aser army temibo director-i mepishiba ama azüoktetba sülena al-Shifa mozüki nungya kanga mejungi shiranger 300 liasü - koba Gaza nung mozüki tulutiba aser tajungtiba liasü. WHO-i anünga aliba shiranger aser staff tem Gaza nung danga mozüki leni belener aotsü asameyanger ta ashir aser ceasefire alitsü ajungshir.

Kasa mapang Washington Post indang report ka nung Israel, Hamas aser US ya Hamas-i October 7 nü apuba tetsür aser tanurtem chiochtsü aser iba melen raraba anogo pongu anena atatsü ta ashiba White House-i langzua liasü. White House odongtar kati iba ama tezüngzüktep kecha yanglua mali saka yamaji molungteptsü meranga inyaker ta ashi. Israel Ato Kilonser Benjamin Netanyahu-i Hamas den ceasefire malitsü ta shiogo aser pua alirtem chiockba melena khen asoshi rara anena atatsü bilemer ta ashi. Shiranger ka dena nisung noklang aika al-Shifa mozüki nungi Honibarnü ainshi. Parnok dang mozüki yutsür aotsü ashi ta mozüki ketdangsür kari ashir saka Israel-ibo yamaji mashi ta ashir. Temang marakzütetba shirangertem aser doctor kar dang anünga lir, ta al-Shifa hospital nungi osangbener kati ashi. "Onok teka making aser nisan temesung bener jaja," ta iba mozüki nung alisang

osangbeneri ashi. Mozüki nung shiranger 120 aser anungji asoba kinü tanur kar lir, ta Hamas indang health ministry ajanga shia liasü. IDF-i al-Shifa mozüki azüngtsütsü totuyuba magütsü ta ashir aser mozüki yutsür onürtem ainshidaksütsü asoshi mozüki indang director-i mepishiba ama inyaker ta ashir. "IDF-i kodanga shiranger mesüra medical team ainshitsü totuyuba magütsü, saka medical evacuation asoshi mepishiba ama IDF-i inyaktsü molung," ta sangdong ka ajanga ashi. Israel ketdangsür temi al-Shifa mozüki nungi ainshitsü totuyuba agütsüba ama ainshisang doctor Ramez Radwan-i ashiba agi, mozüki nung painkillers mesüra antibiotics mali aser shiranger karbo zübu nungi mesen adoker. Hamas dak tenük yoker operation agiba nung shilem ka ama tawa Israel mitkar temi iba mozüki ya sapanger meita ao, saka iba mozüki telung nung Hamas indang longpok lir ta jembiba asoshi tejangja kuli

magütsüteti lir. Ano Hamas health ketdangsür temi ashiba agi, northern Gaza nung Jabalia nung bomb ana apokdang nisung 80 asü. Israel-i UN indang school ana amakba mejangjar ta shiogo aser iba tatalokba bushisüngdangba mapang lir. BBC Verify ajanga video tem geolocate asüba mapang video ya Jabalia nung aliba al-Fakhoura school nung tangokba ta jangjatet, kong tetsür aser tanurtem densema nisung aika kanga sashia yirur mesüra marakzüi ali nung mejanga aliba angu. Iba video nungya iba ama asü-amar nisung 20 dak tema angu aser item ya tesadang ka ground floor indang takdang ka nungi liasü. United Nations agency for Palestinian refugees (UNRWA) indang tekolakba Philippe Lazzarini-i ashiba agi, par agency indang school ka nung nisung aika tepsetba aser yiruba noksa aser video tem pai nguogo, kong nisung meyirijang aika jenoka liasü. Ano Hamas indang health

ministry ajanga ashiba agi, Jabalia nung Israel nungeri tayimtsü amshia amakdang kibong ka nungi nisung 30 dak tema tepset. Iba osang nung Israel Defense Forces nungi telangzüba kecha agüja mali saka parnoki Hamas samatsütsü mechi Jabalia densema Gaza nung operations ulushir ta ashi. Parnoki northern Gaza nung aliba Palestine nunger dang pei takum kumzüksü asoshi iba tesem yutsür aotsü shiogo aser tang south tsütsü Khan Younis yimti nung aliba nüburtem danga iba yimti yutsür aotsü ashir, shirnok northern Gaza nungi arua jenoka lir. Hamas-i October 7 nü Israel amakdang nisung 1,200 tepsetba den anu nisung 240 dak tema pua bener aoba mechi tayang kepzüker aser iba telok samatsütsü nükjidong lir, ta Israel-i ashir. Hamas meyong health ministry ajanga ashiba agi, Gaza nung nisung 12,300 junga süogo. Nisung 2,000 dak tema ki o jen chirepba agi nembanga alitsü südi ta ashir.

Australia-i ICC Cricket World Cup kokogo



Yimpoksüi/November 19, 2023 (Agencies): Deobarnü ICC Cricket World Cup final India aser Australia na Ahmedabad nung asaya Australia-i wicket trok agi koka tang agi trokbenbuba iba asayamung ya kokogo.

Deobarnü nikongtsütsü Narendra Modi Stadium nung final asaya nung Run arishiba mapang Australia nung asayar asem kara out süatok ajisüaka parnoki kanga süngjemshir asaya-a iba asaya ayong ayonga kokogo.

Parnok rongnungi Head-i tajungba asaya, pai run 137 yanglua liasü.

Middle order batter temi ball 120 nung run 137 yanglu aser

Marnus Labuschagne-i ball 110 nung run 58 yanglua Australia team takok dangi ani.

Hopta trok tejakdang iba asayamung tenziükba mapang asayamung akoktsü imlartem rongnung Australia densema maliasü, saka Pat Cummins-i aniba team yagi iba asayamung koktetogo.

Australia team iba asayamung nung mezüngbuba asaya India den October 8 nü asaya aser iba mapangbo India team nungi asayar Virat Kohli aser KL Rahul nati par team takok dangi ania liasü.

Ahmedabad nunga India team kasa tensa nung liasü, kong Kohli (54) aser Rahul (66) nati maneni team kümzüka

liasü. Ajisüaka ajak dang tongtibangtiba asaya nung India team nungi batter temi junga masayatet aser parnoki over 50 nung run 241 dang yangluteta liasü.

Kasa mapang nung Mitchell Starc-i (3-55; 10 overs) anir Australia nungner bowler temi kanga junga asaya India nungner batter tem nem kecha maangka magütsü. Parnok rongnung captain Cummins-ia ball kanga junga ona over 10 nung run 32 agütsür wicket 2 agia liasü. Josh Hazlewood-ia over 10 nung run 60 agütsür wicket 2 agi.

India captain Rohit Sharma-i India nungner innings kanga junga tenzüka ball 31 nung run 47 yanglu ajisüaka pa dak alak India nungner batter tem kati danga Australia nungner bowler tem nem timtem magütsü.

Australia-i tatemsa ODI World Cup ya 2015 küm kokogo. Linük ajak rongnung parnoki ODI World Cup timba ben koka lir aser India aser West Indies amala iba asayamung anabenben koker aliba linüktemia parnok meneptsü talangka lir. ODI World Cup ya Pakistan, Sri Lanka aser England nungneria khen khen koker lir.

Nagaland Wushu Association-i NOPG trails atema metetdaksü

Kohima, Yimpoksüi/November 19 (TYO): Taruba 3buba Nagaland Olympics and Paralympic Games dak sendakba nung Nagaland Wushu Association-i District Wushu Association ajak dang taruba state level championship atema renemshitsü asoshi selection trails agitsü metetdaksüogo.

Teburtem 51kg, 55kg, 59 kg, 64 kg, 69 kg, 74 kg, 79 kg, 84 kg, 89 kg, 94 kg, 95 kg aser temapurtem atema trails agitsü.

Tetsürtem 45 kg, 49 kg, 51 kg, 55 kg, 59 kg, 64 kg, 65 kg aser temapurtem trails agitsü.

Iba dak sendakba nung district WA ajak dang trails agia December 15 tashi nungbo asayartem list agütsütsü metetdaksüogo.

Osang tejangjaba agitsü asoshi Azhove Resu; 9916580774, Kang Kang; 9856240566 aser Gabriel Khamo; 7630994233 nungner den tongteprateptsü asoshi metetdaksüogo.

Vinicius yirur ita ana tashi masayatetsü



Yimpoksüi/November 19, 2023 (Agencies): Real Madrid forward Vinicius Júnior, South American World Cup qualifying nung Brazil team nungi asayaba mapang tetsü yirurogo, ta club sangdong ka ajanga metetdaksü.

Real Madrid forward yagi Gabriel Martinelli nem ball tajung ka agüja asaya tenzüker minute pezübuba nung goal ka idakja liasü, ajisüaka pa asaya mezüngbuba shilem matem tsüngda yirur tugutsüsa aküm. Iba asaya ya Brazil-i goal 2-1 agi Colombia mekoki liasü.

Madrid-i ashiba agi, Vinicius temang tendangba sülen pa tetsüng tabelen nung tetsü shisar aliba ngutetogo. Parnoki pa mapa kobika masayatetsü iba indang osang magütsü ajisüaka iba amala yiruba ya taneptsü angutsü asoshi ita anashi agir.

Iba season tetenzüklena August ita 25 nü Vinicius hamstring yirua liasü. Iba sülen pa ita ka shi masayatet aser September tatemlen nungiang asaya liasü.

Madrid pur yiruba ajanga forward nung kanga timtema

arudar aser tang Vinicius yiruba ya parnok asoshi kanga dang tongtibang mapang takoksa tulu asütsü, ajisüaka tiaka parnoki Champions League round of 16 atemabo qualify süatokogo.

Madrid pur Champions League knockout stage atema qualify süogo aser Spanish League nung parnoki temaba jenjang nung aliba Girona sülen point ana agi memenepi tanabuba jenjang nung lir.

Arishi küm 23 tain Vinicius-i tang asaya aliba season nung Madrid atema goal trok idaktsür lir, kong team pur taoba asaya asem nung goal ana idaktsüba densema lir.

International break mapang Vinicius dang masü saka Eduardo Camavinga-a France team den training agiba mapang temekok tachichilen yirua liasü. Madrid nungi asayarsa Jude Bellingham aser Arda Guler naprongla yirur lir.

Maneni Madrid pur first-choice goalkeeper Thibaut Courtois aser Kepa Arrizabalaga naprongla yirur lir aser Aurelien Tchouameni-a January ita tashi masayatetsü.

Euro 2024 Qualifiers: France aser Netherlands na qualify süogo

Yimpoksüi/November 19, 2023 (Agencies): Honibarnü Euro 2024 qualifier nung France aser Gibraltar na asaya nung Kylian Mbappe-i hat-trick ka idakja parnoki asaya goal 14-0 agi kokogo. Kasa mapang nung Netherlands-a Euro 2024 atema qualify süogo.

Nice nung goal 14 agi iba asaya akokba sülen France-i European qualifier nung otsü tasen ka yangluba den iba ya linük asoshia otsü tasen ka liasü.

Asaya nung Ethan Santos' own goal ka idakja asaya tenzüker aser iba sülen Marcus Thuram-i tanabuba goal idaktsü aser arishi küm 17 tain Warren Zaire-Emery-i tasembuba goal idakja liasü.

Ajisüaka goal ka dang idaktsüba sülen PSG midfielder

Zaire-Emery ya tetsüng yiruba ajanga tuguatoktsüsa aküm aser. Asaya nungsa minute 18buba nung Santos nem Red card ka agüja asaya nungi tugudaktsüba ajanga France team asayar 10 den tayongba asaya.

Mbappe-i penalty ka idaktsüba sülen goal 4-0 aküm aser Jonathan Clauss, Kingsley Coman aser Youssouf Fofana nungneria asaya mezüngbuba shilem metembang tsüngda goal kaka idakja liasü.

Asaya tanabuba shilem nung Adrien Rabiot, Coman aser Ousmane Dembele nungneria goal kaka idaktsü aser Mbappe-ia goal ana idakja hat-trick ka ngua liasü.

Iba goal idaktsüba sülen France captain ya arishi küm 24

dang süaka tang tashi nung goal 300buba idaktsüogo.

Maneni asayar tejen Olivier Giroud-a substitute ama aita team atema goal ana idaktsü aser Germany puri 2006 küm 2008 qualifier atema San Marino den asayaba mapang goal 13-0 agi asaya koka otsü tasen ka yanglur aliba ajatetogo.

France-i 1995 küm European qualifier nung Azerbaijan den asayaba mapang goal 10-0 idaktsür aliba ya goal timtiba idaktsüba liasü.

Kasa mapang nung Group B nung Netherlands team-i goal 1-0 agi Republic of Ireland koka parnoka qualify süogo.

Amsterdam nung iba asaya asayaba mapang Wout Weghorst-i goal ka idakja parnoki iba asaya koka liasü.

Manchester United-i Griezmann anir arutsü asadanger

Yimpoksüi/November 19, 2023 (Agencies): Manchester United pur tang asaya aliba season nung goal midaktsüteti asaya aruba tebilemtsü bentetsü atema France nungner striker Antoine Griezmann anir arutsü atema asadanger, ta osang ajanga metetdaksü.

Eri ten Hag-i aniba Manchester United pur tang Premier League nung asaya 12 nung point 21 ngua trokbuba nung lir. Parnoki tang tashi nung asaya tenet koka lir aser pongu nung tamakok nguogo. Parnok PL table nung mezüngbuba jenjang nung aliba City dang nung point tenet agi tajemba lir.

United puri iba season nung goal midaktsüteti arudar aser tang tashi nung goal 13 dang idaktsür lir. Parnok rongnungi striker Marcus Rashford-ia taoba season asayaba ama masayateti arudar.

United nungi asayar tasen Rasmus Hojlund, shibai UEFA Champions League asayaba mapang goal idakja liasü, pai Premier League nungbo tang tashi goal ka danga midaktsüteti lir.

Goal idaktsütetsüsa asayar tajung ka maliba apir team aachayangertemi France nungner asayar tejen ya Atletico Madrid nungi anir arutsü asoshi

asadanger.

Osang ajanga ashiba agi, Griezmann den sensak asemstü atema United representatives tem Spain-i ogo. Griezmann-i dang United-i arutsü mulungra pa nem Atletico nung agüja aliba itasen asemben agi timba agütsütsü United pur renema lir, ta osang ajangsa metetdaksü.

Pa tajangshiba ya United atema kanga tajangzüker asütsü, shirnok UEFA Champions League nungia tetsüker dang lir. Champions League nung United puri asaya pezü nung ka dang koka lir aser parnok taruba asaya ana Galatasaray aser Bayern Munich den asayatsü lir.

BILEMDANGANG

"Tangari na atema koma inyakdaksüner yamaji naia inyangang."